

# **TATA IBADAH MINGGU WANITA GKPS/ HARI PEREMPUAN INTERNASIONAL Minggu, 8 Maret 2020**



**Tema:**

**Ibohali Manghobaskon Horja na Madear (2 Timoteus 3:17)**

**Sub Tema:**

**"Pasirsir ma Kuria in ase gabe Sipambobai na Toruh Maruhur, Sihabiari Naibata, Sibalosi Ajar, ibagasi Biak na Madear, ase lambin Tarbarita Goran ni Kristus" (Matius 5:18-19; Markus 9:35)**

## 1. **Persiapan**

- Marlajar lagu
- Martonggo haganupan Sipartugas i konsistori

## 2. **Prosesi**

*(Mandodingkon Halleluya No. 414:1-2)*

Eta nasiam! Eta nasiam!

Misir hita hu gareja laho marminggu.

Sihol manangar ambilan hata ni Tuhan.

Eta nasiam!

*---Jongjong Kuria---*

Roh ma nasiam! Roh ma nasiam!

Halilian mambaen kahou ulang tangihon.

Dearan ma na marminggu sai na porluhon.

Roh ma nasiam!

## 3. **Votum - Introitus - Tonggo**

- P. Ibagas goran ni Naibata Bapa, pakon Tuhan Jesus Kristus ampa Tonduy Napansing, Sitompa langit pakon tanoh on. Amen  
Puji ma Jahowa, ale sab tanoh on!
- K. Balosi nasiam ma Tuhan in ibagas malas ni uhur, roh ma nasiam hu lobei-Ni marhasoman olob-olob.
- P. Botoh nasiam ma, Jahowa, Ia do Naibata. Ia do na manompa hita, Ia do simada hita, bangsa-Ni anjaha biribiri na pinarmahan-Ni.
- K. Masuki nasiam ma horbangan-Ni marhitei hatarimakasihon, sonai alaman-Ni marhitei puji-pujian. Martarima kasih ma nasiam Bani, puji nasiam ma goran-Ni!
- P. Ai pardear layak do Jahowa, ronsi sadokah ni dokahni do idop ni uhur-Ni, anjaha marsundut-sundut do hasintongan-Ni.  
Halleluya, halleluya, halleluya.
- K. (Mandodingkon songon doding Halleluya No. 343 "Banggal Tumang")  
Halleluya, halleluya, halleluya, Amen  
Halleluya, halleluya, halleluya, Amen
- P. Martonggo ma hita!  
Ham Tuhan Naibata, Parholong atei na tarsulur na manompa langit pakon tanoh on. Ipuji hanami do Ham halani layak-Mu in. Mardohar

janah marmulia ma tongon goran-Mu bani sab tanoh on marhiteihon ni ibadahnama sadari on. Nuan martumpu do hanami ijon bani Pesta Minggu Seksi Wanita irik Hari Perempuan Internasional i kuria-Mu. Ibagas malas ni uhur ampa olob-olob do hanami roh hu lobei-Mu, mangkatarimakasihkon parmudu-mudu ampa pangkasomanion-Mu bennami. Marhitei Pesta on, sai lambin matoras ma haporsayaonnama janah lambin tambah gogohnami mamuji pakon pasangpakon Ham. Pasu-pasu Ham ma hanami haganup na martumpu on, ase tongtong ibagas malas ni uhur ampa marpangarapan hu Bamu. Ibagas goran ni Anak-Mu, Yesus Kristus Tuhannami. Amen.

---*Hundul Kuria*---

**4. Mandoding Haleluya No. 407:1-2**

Puji ma Jahowa Tuhan Naibata, ai marjumbalang do Goran-Ni in Haganupan jolma sai marsombah ma, sai hagoluhkon Hata-Ni in Holsoh haganupan mambur, tubuh ma malas ni uhur

Gok bai pangarapan holong na totap, rap mangolobkon Goran-Ni in Ningon do marsombah bani Naibata, puji ma la pargogoh do in Ulang marnaloja sai irikkon ma, rap mambalosi hata-Ni in Holsoh haganupan mambur, tubuh ma malas ni uhur  
Gok bai pangarapan holong na totap,  
Rap mandodingkon: Haleluya!

**5. Gantih ni Titah Na sapuluh**

P. Tangar hita ma Hata ni Naibata gantih ni Titah na sapuluh in, aima na tarsurat bani Kolose 3:12-15, "Ai pe, nasiam na dob pinilih ni Naibata, na mapansing anjaha na hinaholongan, pakei nasiam ma biak paridop ni uhuran, habasaron, toruh ni uhur, halamlamon, ampa lubang ni uhur, marsianju-anjuan anjaha marsisasapan dousa, anggo marpangkurangi uhur ni na sada dompak hasomanni; songon na dob isasap Kristus dousa nasiam, sonai ma homa nasiam marsisasapan. I atas ni ganupan ai dalankon nasiam ma holong, ai in do rahut-rahut ni sagala hadearon. Anjaha damei ni Kristus ma manrajai ibagas uhur nasiam, ai hujin do nasiam tardilo gabe sada angkula. Gabe sipartarima kasih ma nasiam."

Riap ma hita mangindo:

K. Ham Tuhan Naibata sai pargogohi Ham ma ahu mangkorjahon Hata-Mu ai. Amen.

**6. Mandoding Haleluya No.319:1-2**

Ningon Jesus hasomanku pitah ahu kahou do  
 Rapkon Jesus boi au monang talu munsuhkin ganup  
 Seng mabiar au ijin Jesus do hasomankin  
 Sai irikkononku Jesus balosanku mando in  
 Pitah Jesus hasomanku bani sitarononkin

---Jongjong Kuria---

Pitah Jesus hasomanku bani sitarononkin  
 Sai hu Bani husuhutkon haganup na borat in  
 Seng mabiar au ijin, Jesus do hasomankin  
 Sai irikokonku Jesus balosanku mando in

**7. Tonggo Mangindo Hasasapan ni Dousa**

P. Pasirsir hita ma uhurta, martonggo ma hita sopotkon hita ma dousanta hubani Tuhan Naibata!

Ham Tuhan Naibata parholong ni atei na tarsulur, roh do nuan hanami hu lobei-lobei-Mu mambobankon dirinami. Mangaku do hanami, pardousa banggal do hanami marhitei uhur, parsahap ampa pangabak. Ham ale Tuhan, dompakkon Ham ma bohi-Mu bannami na doyük on.

K Tatap Ham ma hanami ale Tuhan janah padaoh Ham ma hanami humbani uhur hengkeng, na lang mandalankon hasintongan-Mu in. Iakuhon hanami do ganup dosanami, janah in ma na gabe hiteinami roh hu-Bamu. Ham ale Tuhan, holong ma Ham bannami

*Singer + Kuria (mandodingkon) "Ham Tuhan Holong Ma Ham"*

**HAM TUHAN HOLONG MA HAM**

*Ito B Purba 2017*

F = Do 3 ketuk

3	.	2	4	.	3	<u>3</u>	2	1	2	.	.	1	2	3	<u>4</u>	<u>3</u>	2	5	1	7	1	.	0
1	.	1	6	.	1	<u>1</u>	7	6	7	.	.	1	2	3	<u>1</u>	<u>1</u>	7	5	5	5	5	.	0
5	.	5	1	.	5	<u>5</u>	<u>4</u>	3	5	.	.	3	4	5	<u>6</u>	<u>5</u>	5	5	3	2	3	.	0

Ham Tu – han ho – long ma Ham, sal-pu-hon Ham gan-nup do-sang-kin

P Ham Jahowa, Ham do sibotoh haganupan! Ibotoh Ham do uhur lekluk na manrajai goluhnami. Paruhuri Ham ma hanami marhitei idop pakon holong ni atei-Mu. Ulang ma padaoh Ham bohi-Mu humbannami tapi togu Ham ma hanami hubani holong-Mu.

K. Hotop ope biaran hanami bani goluh pardagingon marimbang manangihon sora ni Tonduy in. Hampung ni uhur bani tanggung jawab i kuria-Mu; pataridahkon lape ope tubuh uhur biar bannami selaku sipangihut bani dalan-Mu. Ham ale Tuhan, holong ma Ham bannami.

*Singer + Kuria (mandodingkon) "Ham Tuhan Holong Ma Ham"*

P Ipangindo Ham do ase tetap ibagas rosuh-Mu hanami, mangkaholongi hasoman age sidea na manghagigihon hanami pe. Anju Ham ma hanami na galek on Tuhan, ase ulang magou hanami bani langkahnami.

K Marpangulaki ma uhur-Mu mangidah hanami, Ham ale Tuhan siparholong na tarsulur.

*Singer + Kuria (mandodingkon) "Ham Tuhan Holong Ma Ham"*

P Tangar anjaha haporsayai hita ma Hata ni Naibata, bagah-bagah pasal hasasapan ni dousa. "Songon sintong ni manggoluh Ahu nini Tuhan Jahowa: Sabonar seng marosuh uhur-Hu mangidah hamateian ni parjahat, tapi ase mulak do parjahat in manadingkon dalanni, ase manggoluh ia" (Hesekiel 33:11). Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangaponma bani Naibata i babou.

P+K Amen

*---Hundul Kuria---*

## **8. Mandoding Haleluya No. 442:1-2**

Bai pardalanan ni goluhku, ningon do Jesus i lambungku.

Golap do tong hu idah ge siang ni ari anggo lang Jesus i lambungku manondangi

Ai hata Mu Tuhan, panondang na tetap, na manondangi uhur na golap.

Megah mardalan au, hinsah tunggung jagar, ai Ham manogu au bai dalan na lihar

Bai pardalanan ni goluhku, ningon do Jesus i lambungku.  
Golap do tong hu idah ge siang ni ari  
anggo lang Jesus i lambungku manondangi

Ge pe buei roh parmaraan, seng pala au be sai songgotan.  
Lombang na bagas buntu-buntu hudalani,  
hubotoh Jesus do tongtong mangkasomani.  
Ai Hata-Mu Tuhan panondang na totap,  
na manondangi uhur na golap.  
Megah mardalan au hinsah tunggung jagar,  
ai Ham manogu au bai dalan na lihar.  
Ge pe buei roh parmaraan, seng pala au be sai songgotan.  
Lombang na bagas buntu-buntu hudalani,  
hubotoh Jesus do tongtong mangkasomani.

**9. Mambasa Epistel: Rom 5:1-11**

- P. Ase, dob ipintori hita halani haporsayaon, mardamei ma hita pakon Naibata, marhitei Tuhanta Jesus Kristus.
- K. Marhiteihon-Si do boi masuk hita hubani idop ni uhur halani haporsayaon, ai ma hajongjonganta nuan, anjaha megah do hita halani pangarapan bani hasangapon ni Naibata.
- P. Tapi seng pitah ai, megah do homa hita ibagas hamarsikon, ai ibotoh hita, ihorhon hamarsikon ai do hasabaron;
- K. hasabaron ai mangkorhon hatalupon, anjaha hatalupon ai mangkorhon pangarapan.
- P. Anjaha pangarapan ai seng parah habadoron, ai domma iuseihon hubagas uhurta holong ni uhur ni Naibata marhitei Tonduy Na Pansing, na dob binere-Ni banta.
- K. Ai sanggah galek ope hita, ijai ma tongon matei Kristus mangkompok parjahat.
- P. Ai payah do dong na ra matei mangkompok parpintor; ra, adong do na barani matei mangkompok halak na bujur.
- K. Tapi Naibata, domma ipatalar holong ni uhur-Ni ai banta, ai ma marhitei na matei Kristus mangkompok hita, sanggah pardousa ope hita.
- P. Ase lambin maluah ma hita nuan humbani ringis in marhiteihon-Si, dob ipintori hita ibagas daroh-Ni ai.

- K. Ai anggo ipadamei hita pakon Naibata sanggah munsuh-Ni ope hita, marhitei parmatei ni Anak-Ni in, ai lang lambin maluah ma hita, na dob pinadamei-Ni in, dob manggoluh Ia?
- P. Tapi seng pitah ai, megah do homa hita ibagas Naibata, marhitei Tuhanta Jesus Kristus, ai marhiteihon-Si do ijalo hita nuan pardameian in. Dousa pakon hamatean roh marhitei si Adam, tapi idop ni uhur ampa hagoluhan roh marhitei Kristus. Amen. Martuah do na manangar Hata ni Naibata anjaha na marimbagashonsi!
- K. Amen

**10. Mandoding Haleluya No. 497:1-2**

Holong ni Jesus manggomgom ganup kuria  
Na patotapkon hasadaonta in.  
Damei-Ni in ma manrahut paruhuranta,  
Idop uhur-Ni batar-batarta in  
Damei-Ni in ma manrahut paruhuranta,  
Idop uhur-Ni batar-batarta in.

Riap ma hita sahur martangkap tangan,  
Ibagas damei na humbai Tuhan in.  
Marpangarapan tongtong bai horja ni Tuhan  
Hataridahan ni hasintongan-Nin  
Marpangarapan tongtong bai horja ni Tuhan  
Hataridahan ni hasintongan-Nin

**11. Manaksihon haporsayaon**

**12. Acara Khusus**

- **Mambasa Surat Tongosan**
- **Mambasa Puisi "Mama"**
- **Koor Wanita GKPS**
- **Tonggo Pangapition**
- **Tingting**

**13. Mandoding Haleluya No. 490:1-2**

Sonang rapkon Jesus in, rapkon Jesus tongtong  
Rapkon Jesus tongtong  
Ia Panondang bai na golap in, rap Jesus daoh biar ijin

Baritahon Jesus in, pakon hasintonganNin,  
Janah ulang mabiar ham ijin  
Baritahon Jessu in, pakon hasintonganNin,  
Janah ulang mabiar ham ijin.

Sai ambilankon ma in, ambilankon ma in,  
Ambilankon ma in, hasintonganNi sahapkon ma in  
Rap Jesus daoh biar ijin,  
Ambilankon Jesus in pakon ganup HataNin  
Janah ulang mabiar Ham ijin  
Ambilankon Jesus in pakon ganup HataNin  
Janah ulang mabiar ham ijin.

14. **Ambilan : 2 Musa 17:1-7**  
*(Totap ma Parambilan bani langgatan das hubani na manutup ibadah)*
15. **Galangan (Agenda Model A)**
16. **Tonggo Galangan – Panutup- Paingkatkon-Pasu-pasu (Agenda Model A)**

## **Acara Pesta**



Lampiran :

Puisi: (Dibacakan 2 orang anak)

**“Mama”**

Mama, memelukmu adalah kenyamananku  
Melukis senyummu adalah keinginanku  
Mencintaimu sudah tentu kewajibanku  
Namun...., terkadang

Melawanmu menjadi kebiasaanku  
Bahkan ku menya-nyiakanmu dan  
Melupakanmu sebagai seorang mama  
Tanpa ku sadari begitu teririsnya hatimu  
Harusnya aku menjadi pelindung  
Bukan menjadi anak yang tak tahu untung  
Harusnya aku menjadi anak yang penurut  
Bukan menjadi anak yang banyak menuntut  
Aku masih sangat ingat....

Ketika tak ada biaya untuk kubawa berangkat meraih asa  
Dari kampung menuju perkotaan yang memberi seribu harapan  
Ketika itu hujan begitu lebatnya

Kakimu kau paksa untuk menapaki jalanan yang licin  
Hanya modal payung usang

Mama menjajal rumah demi rumah  
Dengan hati terisak dan penuh harap  
Tak peduli petir menyambar

Mama tetap berjalan dengan sabar  
Meski tubuh sudah gemetar

Ibu masih tetap semangat  
Terimakasih untuk Tuhan Sang Pencipta  
Kau beri aku seorang perempuan tangguh

Yang selalu mengusap air mata  
Ketika dilanda derita

Yang punya hati sebening permata  
Yang menjadi sumber mata air cinta

Selamat Minggu Pesta Wanita GKPS dan Hari Perempuan  
Internasional Tahun 2020

Amin

